

INUIT ATAQATIGIIT

Inatsisartuni



Nuuk 23.april 2019

Inatsisartut suleriaasianni § 37, imm. 1 naapertorlugu matumuuna Naalakkersuisunut imaattumik apeqquteqaateqarpunga.

Apeqqutit:

- 1. Kalaallit filmiliornermik tv-liornermillu namminersorlutik ingerlataqartut pisinnaatitaaffiisa illersorneqarnerulernissaat anguniarlugu, Danmarks Radiomik isumaqatigiissutaasup qimerlooqqinneqarnissaa, nalilersuiffigeqqinneqarnissaalu siunertaralugu Kulturimut Naalakkersuisoq DR-mut saaffigiinnissuteqassalluni pilersaaruteqarnerpa?**

(Inatsisartuni ilaasortat Peter Olsen, Inuit Ataqatigiit)

Tunggavilersuut:

Namminersorlutik Oqartussat Danmarks Radiollu akornanni isumaqatigiissutaasup Kalaallit Filmiliortut TV-liortullu ajoquserpai.

Nam.Oqartussat Danmarks Radiomik, Nunatta, Qallunaat Nunaatalu akornanni tusagassiutinut tunggasunik siammartereqatigiittarnissamik isumaqatigiissuteqarsimapput. Tamannalu iluarusuutigineqarpoq, taamaaliornikkut DR-ip aallakaatittagai nunatsinni takuneqarsinnaalermata, suleqatigiinnerullu aamma nassataraa suliareqqitassanik (rãmateriale) imarisaanillu avitseqatigiissin-naaneq DR-ip aammalu KNR-ip akornanni.

Tunggaviusumik avitseqatigiissinnaanermik isumaqatigiissut pitsaasuvoq, taamaattorli nunatsinni nammineerluta filmiliorpallaanngikkallarnitta, TV-kullu aallakaatitassarsiorpallaanngikkallarnitta nalaani, isumaqatigiissutaasup annikitsualuttortaanik isumaqatigiissusiorneq pisimavoq, tamatuma kingunerisimavaa kalaallit filmiliortartut piginnittussaataanerisa illersorneqarnissaat eqqarsaatigineqanngitsoorsimalluni.

Kalaallip filmiortup filmiliani DR-kkut takutitassanngorlugu tuniguniuk, taava DR-ip isumaqatigi-issutitut nalinginnaasutut isigalugu, Naalagaaffeqatigiiffiup iluani aallakaatissinnaalissavaa, tassa imaappoq DK-mi, Kalallit Nunaanni aamma Savalimmiuni. Tamannalu ajornartorsiutitaqarpoq, pissutigalugu taamaaliornikkut DR-ip kalaallit isiginnaagassiaat, kalaallinut isiginnaartartunut isiginnaartissinnaalissavai, taamattoqarneranilu kalaallit isiginnaagassiorartut isertitassaraluarminnik, inuussutissarsiuutigisinnaasaraluamminnillu annaasaqassallutik.

Aammattaaq DR-ip filmit nittartakkaminnut DR.TV-mut ilisarpai, tamaalilluni kikkunnit tamanit Naalagaaffeqatigiinnerup iluani, akeqanngitsumik aaneqarsinnaanngortillugit. Naak DR nunanik aallersinnaasunik mattussisinnaagaluarluni, taamaattoq nunarput mattukkumasimangilaa isumaqatigi-issut innersuussutigalugu. Taamaaliornikkut kalaallit filmiliortatut suliaminnik DVD-kkut, Blu-Ray-kkut online-kkullu tuniniaasinnaanerigaluat suujunnaarsinneqassaaq, suliat suulluunniit akeqanngitsumik DR-kut aaneqarsinnaanerat pissutigalugu.

Naalagaaffeqatigiiffiup iluani kulturikkut avitseqatigiinneq pitsaasuvoq, taamaattorli isumaqatigiissutaasup iluani ilaanngitsussanik/mik peqartariaqarsorinarpoq, taamaaliornikkut kalaallit filmiliortut pisinnaatitaaffiisa innarlitsaaliorneqarnissaat pillugu. Kalaallit filmiliortuisa pisinnaati-taaffiini innarliisimanernik arlalinnik assersuutissaqalereerpugut, qularnanngilarlu ajornartorsiut suli alligaluttuinnassasoq nunatsinni filmiliat TV-kullu aallakaatitassiat nunatsinneersut amerliartor-tillugit.

Qinnutigissavara apeqquteqaatima ullut suliffiusut qulit iluanni akineqarumaartut.